

Bayisikiri leyintshwa ya Bheki




Vanghana va Bheki hinkwavo
a va ri na tibayisikiri.

Bheki na yena a navela
ku va na bayisikiri.

A hlalela loko vanghana va
yena va khandziyile tibayisikiri
ta vona va ya exikolweni.


“Ndzi navela leswaku ingi ndzi
ri na bayisikiri,” ku vula Bheki.





Loko Bheki a khoma malembe ya
nhungu, manana na tatana wa
yena va n'wi xaverile
bayisikiri yo tshwuka
yi ri nyiko ya siku ra
yena ra ku velekiwa.

Bheki a tsakile swinene.
"Xuu!" a huwelela hi
ntsako. "I khale ndzi
lava bayisikiri. Sweswi
na mina ndzi ta khandziya
bayisikiri na vanghana va mina."





Bheki a tsakile ku
tlula mpimo. U tlulerile
ehenhla ka bayisikiri ya
yena leyintshwa kambe
a wela ehansi.

U ringetile nakambe a
tlhela a wa, a ringeta,
a wa, a ringeta
nakambe a tlhela a wa.

Bheki a nga swi tivi
leswaku bayisikiri yi
khandziyisiwa ku yini.





Yoo! Ndzi ta swi
endlisa ku yini?

U tekile bayisikiri a yi yisa
ekamareni ra yena. U yi
yimisile ekusuhi na mubedo
wa yena. Siku rin'wana na
rin'wana a yi pholicha leswaku
yi tshama yi ri karhi yi hatima.

Bheki a languta bayisikiri
ya yena.

"Ndzi navela wonge ndzi nga
kota ku khandziya bayisikiri,"
a ehleketa. "Ndzi fanele ku
endla pulani."




"Bheki, tana u ta khandziya na hina," ku vitana vanghana va yena.


"Ndzi le ku pholicheni ka bayisikiri ya mina," ku vula Bheki.

"Hikwalaho ka yini u nga yi ehandle u ya khandziya bayisikiri na vanghana va wena?" ku vutisa mana wa Bheki.

"Ndzi le ku lunghiseni ka hutara," ku vula Bheki.



Bheki a nga byelangi munhu
xihundla xa yena. A nga swi koti
ku khandziya bayisikiri.



Vusiku byin'wana na
byin'wana Bheki a ya
exirhapeni a ringeta ku
khandziya bayisikiri ya
yena loko ku ri hava
munhu loyi a n'wi vonaka.

Bheki mbuya, a tshamela
ku wa naswona ku nga ri
khale a ri na timbanga na
swivati emirini wa yena.





Hi vusiku byin'wana, munghana
wa yena Jane, u vonile Bheki a
ringeta ku khandziya bayisikiri
ya yena.

"Bheki!" a vitana. "U nge ndzi
ku khomela bayisikiri leswaku u
ta kota ku khandziya."



Jane a khoma
xikanyakanya a tlhela
a tsutsuma endzhaku
ka Bheki.

U wile kan'we, kambirhi
kutani a nga ha tlhelangi
a wa nakambe.

"Ndzi nga balansa, ndzi
kota ku chovha!" ku
huwelela Bheki.





Bheki a fambisa bayisikiri
hi rivilonyana loko Jane a ri
karhi a tsutsuma endzhaku
ka yena.

Ka va loko a famble
na Ximoli xi ri karhi xi
tsutsuma etlhelo ka yena.

"Ahee!" ku huwelela Jane.
"Ahee!" ku huwelela Bheki
a ri karhi a famba hi
bayisikiri eka ku vonakala
ka n'weti.



Ndzi nga balansa!

Ndzi kota ku chovha!



Siku leri landzelaka, Bheki
u khandziyile bayisikiri na
vaghana va yena va ya
exikolweni. A tsakile lero
a tshamela ku ringeta a
titoloveta.

Loko ro sungula u nga
humeleli, ringeta, u ringeta u
tlhela u ringeta!



Migingiriko ya ku hlaya hi mitlawa



Languta swifaniso.

1

Byela munghana wa wena:

- leswi humevelaka eka xifaniso xin'wana na xin'wana.
- leswaku i xifaniso xihi lexi faneleke ku va xo sungula, xa vumbirhi na xa vunharhu.
- leswaku i nhlokomhaka yihi leyji fambelanaka na xifaniso xin'wana na xin'wana.



Bheki u yile exikolweni hi bayisikiri ya yena.

Jane u pfunile Bheki ku khandziya bayisikiri ya yena.

Vatswari va Bheki va n'wi xaverile bayisikiri.



2


Hlayela munghana wa wena swivulwa leswi landzelaka. Endzhaku longoloxa swivulwa hi ndzandzelelano lowu faneleke.

- Bheki u yile exikolweni hi bayisikiri ya yena.
- Bheki a navela ku va na bayisikiri.
- Jane u pfunile Bheki ku khandziya bayisikiri.
- Bheki a nga swi tivi ku khandziya bayisikiri.
- Bheki u kumile bayisikiri ya nyiko ya siku ra yena ra ku velekiwa.



3

Tirhisa mipfumawulo ku hetisa marito
leswaku ma kota ku yelana na swifaniso.

rh	ch	by	wa	kh	sw
					
_____ anyi	_____ itina	_____ ela			
					
_____ chi	_____ ula	_____ oni			



4

Kopunula xivulwa xa vumbirhi xo hetelela
ebukwini ya wena ya switoloveto. Dirowa
xifaniso ku kombisa xivulwa.



5

Sweswi vulavula hi xitori.

- Ku humelela yini eku sunguleni?
- Ku humelela yini exikarhi?
- Xitori xi herisa ku yini?



Hlamula swivutiso leswi landzelaka.

6


- I yini vito ra xitori lexi?
- I vamani swimunhuhatwankulu eka xitori lexi?
- Hi ku ehleketa ka wena hikwalaho ka yini Bheki a tshamela ku landzula loko vanghana va yena va n'wi vitana leswaku va ta khandziya tibayisikiri?
- Bheki u endlile pulani yahi leswaku a dyondza ku khandziya bayisikiri?
- U ehleketa leswaku Jane a ri munghana wa kahle? Hikwalaho ka yini u vula sweswo?
- Hi rih i rito rin wana ro vula bayisikiri?
- Hi xihi xivutiso lexi u lavaka ku vutisa mudyondzisi wa wena mayelana na xitori?



7

Tianakanye u ri Bheki. Tsalela Jane khadi ro n'wi khensa hi leswi a ku pfunek.

NDZA KHENSA



Eka _____

Ri huma eka _____